

Tabrat wiss Tnayen n Buṭrus

Aseǵem

1 ¹Simēan Buṭrus, ismey d umazan n Yeccu Lmasih, i inni ƣar iǵa anect liman iƣran am neccin s tsegda n Arebbi, amsenjem nney Yeccu Lmasih. ²Nniemet d řehna ad xawem mmarenjen s tmusna n Arebbi d Yeccu, Sidityeƣ.

Tařayit n Arebbi s ueuǵi u s řefđayer nnes

³Aqqa jjehd n Arebbi iwca aney marra min ittxeřša i tudart u i uweqqar n tcuni deg webrid n tmusna n wenni i d aney-d iřayan s ueuǵi u s řefđayer, ⁴i zzaysen i d aney immewcen řwueud iƣran imyaren ařtas, řima ad zzaysen tdewřem tcarcem di řtbiect n Arebbi, am tarewřem zi řyecc i iřekkmen di ddunnit zi ssibbet n nnecwat. ⁵Maca x man aya simant nnes, ggem marra tizemmar nwem, arnim ƣar liman nwem řefđayer uca ƣar řefđayer tamusna, ⁶uca ƣar tmusna dđebt n nnefs, ƣar dđebt n nnefs řřbar uca ƣar řřbar aweqqar n tcuni, ⁷uca ƣar uweqqar n tcuni tayri i wawmaten u ƣar tayri i wawmaten tayri i *iwdan marra*. ⁸Mařa daywem timesřayin-a uca ad daywem feyydent, war kenniw ttejjint texwam niƣ nnebřa řyiǵet di tmusna n Sidityeƣ Yeccu Lmasih. ⁹Minzi wenni war ƣar řint timesřayin-a, iddaryeř, war ittwiři ca ƣar raggwaj, aqqa ittu asizdeg n ddnub nnes inni tuƣa ƣares zic. ¹⁰X uyenni, a aytma, cđarem ktar řima ad tđemnem tařayit d usixđar nwem, minzi mařa teggem aya, xenni eemmarř ad tenqarđem. ¹¹Minzi ammu ad awem immarni wadaf icnan ƣar tgeldit n řebda n Sidityeƣ Yeccu Lmasih. ¹²X uyenni war ttuy ca mařend ad kenniw sseeqřey zi man aya řebda, waxxa kenniw tessnem uca tbeddem di tidett tenni ƣarwem řexxu. ¹³Maca ittyiř ayi nican, min ƣa kkey *ead* deg uqıđun-a, řima ad kenniw ssfaqeƣ uca ad kenniw sseeqřey, ¹⁴minzi ssney, takessit n uqıđun inu ad d tas deƣya, am mammec d ayi issargeb Sidityeƣ Yeccu Lmasih *ewad*. ¹⁵Maca ad ggeƣ tizemmar řima ad teeqřem x tmesřayin-a awarni ufuy inu. ¹⁶Minzi neccin war neđfar ca tiřuja isaysen, umi tuƣa d awem nettbarreř s jjehd s twasit n Sidityeƣ Yeccu Lmasih, maca aqqa neched s tiřtawin

nney x leaḍama. ¹⁷Minzi netta iṭṭef zi Arebbi Tababat ccan d ueuḡi umi d as-d tusa tmijja zeg ueuḡi yueṛan “Wa d Mmi inu ieiẓzen wenni i di ggiy arḍa inu.” ¹⁸Uca nesṛa tmijja-ya tusi-d εawed zeg ujenna umi d aney tuya akis x wedrar iqeddsen. ¹⁹Xenni aqqa yarney awaṛen n imkacafen nican uca ad teggem mlih maṛa tewcim asen taynit am i ij n řefnar yareqqen di taḡest, aṛ i ya idduqqez wass uca tfawt n itri n řefjar ad inqar deg wuṛawen nwem. ²⁰Amezwar ittxeṣṣ ad tessnem belli war din awaṛ i zzayes ittkacaf wedlis n *Arebbi* i nzemmar ad as nfessar elahsab tizi nney, ²¹minzi awaṛ n *Arebbi* war d itteffey εemmarṣ zi min ixsen bnadem, maca iwdan imqeddasen ssiwṛen zi *Arebbi* am d asen-d indeh Arruḥ Iqeddsen.

Ḥḍam ixef nwem zeg imseṛmaden issxarriqen

2 ¹Maca tuya din εawed jar weydud imkacafen issxarriqen, am mammec i ya iṛin uṛa d imseṛmaden zṣur jarawem, ad ssidfen tibridin ittareddḡen s teḥraymect, aṛ i ya nkaren Sidi i ten isyin, ad ssiwḍen areyyeb deyya x yixef nsen. ²Aṭṭas i ten ya idfaren di řeqjahet nsen, aṛ i ya itwaceqqef webrid n tidett zi ssibbet nsen, ³uca s ṭṭmεe i daysen ad zzaywem stenfeen s wawaṛen isaysen axmi *stenfeen* zi sseṛeet, maca řḥukm war ibeṭṭeṛ řweqt aṭṭas uca ahellek nsen war ittnudum ca. ⁴Minzi maṛa *Arebbi* war iṣṣar x lmalakat i yeggin ddub, maca, řami tent inḍar deg *weḥfur qqaren* as Tartarus, aqqa isellem itent di snaseṛ n taḡest ḥima ad din qqiment aṛ řḥukm, ⁵uṛa d ddunnit n zic, war tt iṣṣar, maca netta tuya iḥḍa Nuḥ, ambarreḥ n tsegda, d wenni d wiss tmenya *awarni sebea nneḍni akis*, řami d isfi *Arebbi* ṭṭufan x ddunnit n lkuffar, ⁶uca issecmeḍ tineddam n Sudum d Gamurra aṛami dewṛent d iyyeḍ uca iḥkem xasent s wareyyeb, aqqa yarr itent d lmatal i lkuffar, ⁷uca tuya issenjem Lut, amseggad, wenni tuya ittweddeb aṭṭas zi řeḥruḍ ifuccuḥen n inni war yar teḡi ttawrat, ⁸minzi amseggad wanita, am tuya izeddey jarasen, tuya ittēeddab řeemar iseggden *nnes* zeg wass aṛ wass umi izra uca isṛa řexdayem nsen i war iseggden, ⁹xenni aqqa *Arebbi* issen mammec i ya issuffey zeg uyekkwi inni iweqqaren *Arebbi* d mammec i ya iḥḍa inni war iseggden ḥima ad twaeaqben deg wass n lḥisab, ¹⁰mahu qae inni ḍfaren aysum di nnecwet nsen ixemjen, sseḥqaran ṣṣulta n Sidi. Aqqa-ten d imεeffaren yar tizi nsen, war tteggweden ad ceqqfen x

inni i yar iġa useuġi, ¹¹maħend lmalakat tinni ujarent ten di tizemmar d jjeħd, war ttiwđent ad xasen ħekment s ij n řħukm iceqqfen. ¹²Maca yina, amecnaw lħayawanat ignawen inni iđeffaren t̄bbiet, aqqa twařwen ħima ad twaħbesen u ad twareddġen, aqqa nitni ttceqqafen di min war fehmen uca ad twahelken qaε di řyecc nsen, ¹³ad t̄ffen řyiġet n řexdayem nsen i war isegġden. Itt̄yiř asen d abarreε umi đeffaren ccehwat nsen s uziř, aqqa nitni d ibeqqiden d t̄hebbaxemjen, thillan deg wecmat nsen xmi kiwem ttneċen. ¹⁴Tiřawin nsen ccurent s zzina, aqqa nitni war bedden ca maħend ad xđan u ad ywan řεemur n yinni war ibedden nican uca yarsen uř itwarebban x t̄tmeε, aqqa nitni d tarwa n nneεřet, ¹⁵ffyen zeg webrid isegġmen, weddaren, uca đfaren abrid wenni ikka Bałεam, mmis n Busur, wenni tuya ittexsen řmunet n řyecc, ¹⁶maca wanita iksi ij n uwebbex i řmuεřiyet nnes. Aqqa zzayřet tagnawt tessiweř yares s ict n tmijja n iwdan, temneε tubbuheřya n umkacaf. ¹⁷Nitni d řεunřar war dayes bu waman, d iseynuten twaεarnen s usemmiđ, aqqa tubbarcent n taġest tetwasewjed asen. ¹⁸Am ssawařen s wawařen n tuffet ixwan, aqqa nitni ssyekkwat s nneccwat n weysum u s ufucceħ marra inni igġuren ad arewřen zeg inni iddaren deg uweddar. ¹⁹Waeden asen tiřelli, waxxa nitni simant nsen d isemyan n řyecc. Minzi wi zi tetwayellbed, aqqa i netta cek d ismey. ²⁰Mařa nitni, awarni řami d ffyen s tmusna n Sidi d Amsenjem, Yeccu Lmasiħ zi řexmej n ddunnit, ad d dewřen di texceft nnes εawed uca ad zzayes twayellben, xenni aqqa aneggar nsen ad asen t yura mahu x umezwar. ²¹Aqqa ħsen asen maelik qqimen war ssinen abrid n tsegda zi min ssnen uca řexdenni ad ffyen εawed x tewřeyyet iqeddsen i d asen-d itwasellmen. ²²Aqqa temsar asen am inna wawař-a n tidett “Aqzin aqqa idweř-d x min tuya d iεuqq.” niy *mammec d as qqaren innedni* “Iřef iřfan idakkwař ittmarray deg ubaryuđ nnes.”

Ass n Arebbi

3 ¹A imεizzen, ta d tabrat wiss tnayen i d awem-d uriy uca di tnayen n tebratin nni arezzuy ad ssfaqeř nneyyet nwem iřfan am kenniw ssεeqřeř ²ħima ad tfekkarem deg wawařen inni tuya innan imkacafen iqeddsen zic u di tewřeyyet n imazanen n Sidi Amsenjem. ³Man aya ittuxeřsa ad tessnem d amezwaru, deg ussan inegġura ad

d asen inni isseḥqaran, inni ad uyuren ɣar nnecwat nsen, ⁴ad inin “Mani iḡa řwaed n twasit nnes? Zeg wami tṭšen řejdud nney, ammu i yeqqim kuřci am tuɣa iḡa zeg umezwar řami tetwagg ddunnit.” ⁵Nitni war xsen ad ssnen belli s wawař n Arebbi aqqa din ijenwan aṭas zeg wami, uřa d řbarr i iḡan zeg waman u s waman ⁶i zi ddunnit n řweqt nni tuɣa tetwahellek umi d xas sefyen waman n řhemřet *deg wussan n Nuḥ*. ⁷Maca ijenwan d tmurt n yiđa, aqqa twaḥefden s simant n wawař nni, xemmřen i tmessi ař wass n lḥisab d uweddar n lkuffar. ⁸A imeizzen, war xawem tweddiri ict n řḥajet aqqa-tt d ta: ɣar Arebbi ijj n wass am ařef n iseggwusa uca ařef n iseggwusa am ijj n wass. ⁹Aqqa Sidi war isseizzi deg usuffey n řwaed nnes am mammec d asen ittyiř i ca zwaysen, maca netta iggur akidney s ttasie n řxađar nnes, minzi netta war ittexas ad yareyyeb uřa d ijj, maca maḥend ad tiři ttasie ad tuben marra. ¹⁰Maca ass n Sidi ad d yas amecnaw axewwan di ġiřet. Deg wass nni ad weddaren ijenwan s řḥess ameqqran u timesřayin timezwura *n ddunnit* ad fesyent di tmessi uca tamurt d řexdayem i iḡan dayes ad twassemedent. ¹¹Am marra timesřayin-a ad msarent ammu, mammec ittcuwwar ad tuyurem kenniw s tqeddast d uweqqar n tcuni, ¹²maḥend ad trajam ad tazzřem ɣar twasit n wass n Arebbi xmi i ɣa fesyen ijenwan s tmessi u timesřayin timezwura *n ddunnit* ad fesyent s řebuq nnes? ¹³Maca neccin, ełahsab řwaed nnes, aqqa nettraja ijenwan n jdid d tmurt n jdid mani i ɣa tezdey tsegda. ¹⁴X uyenni, a imeizzen, umi kenniw tettrajam aya, cđarem ad tetwafem zzayes di řehna nnebřa řexmej u nnebřa řeib, ¹⁵uca ḥesbem ttasie n řxađar n Arebbi d asenjem, amecnaw uřa d umatney ieizzen Bulus d awem-d yuran ełahsab tiyit i d as immewcen, ¹⁶amecnaw di tebratin nnes marra xmi d issawař daysent x tmesřayin-a. Aqqa din ca n tmesřayin daysent wearent i řefhamet uca twabeddřent zi řjuhhař d iwdan war iḡin nican, amecnaw ggin nitni uřa i idlisen nneđni d man aya ittawi ɣar wareyyeb nsen. ¹⁷Kenniw, a imeizzen, am *tent* tessnem řexxu qbeř, ḥđam ixef nwem, ḥima war tetwassuffuyem zeg webrid xmi inni iffyen zi ttawrat ad kenniw sseywan s uxetřtu *n sen* uca ad tewđam waxxa tuɣa tbeddem nican, ¹⁸maca s řeeks gmam di nniemet d tmusna n Siditney Amsenjem, Yeccu Lmasiḥ! I netta umi i ɣa yiři ueḡi, aqqa řexxu uca deg wass n řebda! Amin.